



Hi Juan Pusong

HHa usa nga ginhadian, may-ada usa nga lalaki nga Juan Pusong an ngaran. Ambisyoso hiya nga hubya. Pero kadadati niya maghinimo hin istorya.

Usa kaadlaw, nahibaruan ni Juan Pusong nga nagbibiling an hadi hin usa nga pikoy nga nagyayakan. May-ada nahunahunaan dayon hi Juan. Ginbantayan niya an paglabay han hadi. Ha tiilan ni Juan may ada nabutol nga butang na may taklob nga tela. Gin usa dayon ini han Hadi.

“Ano ito nga aada ha imo til-an?” pakiana han hadi.

“Amo ini an akon binantayan nga pikoy,” baton ni Juan.

“Pikoy? Sige daw, igpakita ha akon.”

“Hala, pasayloa Mahal nga Hadi. Diri ko ito mahihimo. Kun kukuhaon ko an taklob nga tela, dayon nga malupad an akon pikoy.

“Ungod ba?” nahipapausa nga pakiana han hadi. “Papaliton ko an pikoy. Adi an usa ka sako nga bulawan. lupod ko nala liwat gihap an akon kabayo.”

Naghunahuna anay san-o bumaton hi Juan Pusong.


“Mabug-at man ha akon dughan nga mawawara an akon pikoy, natugot ako kay an Mahal na nga Hadi an nagyayakan. Pero ikaw na an kinahanglan kumuha han pikoy. Hinay-hinay la pagharani ngan kahuman tigda nga hakbuta an pikoy.”

Kinarawat ni Juan an bulawan, ngan ginsakyan an kabayo paharayo han hadi ngan han iya mga magbarantay. Dayon ginhimo han hadi an ginyakan ni Juan pakalakat niya. Han paghakbuta han nakadto han ilarum han tela, kinalasan hin duro an hadi! Imbes nga pikoy, usa ka tambak hin uros hin karabaw an iya naharop!

Duro an kaurit han hadi. “Bilnga ito nga parapanguwat!” lhapil hiya ha dagat!” sugo han hadi.

Nahikit-an dayon han mga magbarantay hi Juan. Gindara hiya ha baryo ngan iginhigot ha poste. Papatawan hiya kinabuwasan han aga. Nagtinangis hi Juan ngada han may umagi nga prinsipse.

“Kamakaloolooy man nimo. Ano an imo sala?” pakiana han prinsipse.



“An hadi! Karuyag niya nga pakaslan ko an iya anak. Pero nadiri ako. Diri ko pa karuyag mag-asawa,” baton ni Juan.

Nalipay an prinsipe han pakabati.

“Bubuligan ko ikaw. Bubuhian ko ikaw. Igsul-ot ini nga akon bado ngan igsusul-ot ko naman an imo bado. Ako naman an imo ighigot. Nalilipay nga siring han prinsipe.

Amo an nahitabo. Kinabuwasan, umabot an mga magbarantay ngan gindara an prinsipe nga nagpanggap nga hi Juan Pusong para ighulog hin usa nga bangin.

“Ayaw anay! Diri ba niyo ako bubuhian kun maruruyag ako magpakasal han prinsesa?” nauusa nga pakiana han prinsipe. Ginkatataw-an hiya han mga magbarantay. Didto na nahisabtan han prinsipe nga gin-uwat la hiya ni Juan Pusong.

Ighuhulog na unta an prinsipe han pag-abot han iya tinapuran nga kagab-i pa hiya nagbibiniling ha iya. Hito dida nakilal-an kun hin-o gud hiya ngan nakatalwas. Ginhangyo niya nga diri igpadayag an nahitabo. May ada nahunahunaan an prinsipe nga bubuhaton.

Ha lain nga istorya, hi Juan Pusong nga nakasul-ot han bado han prinsipe kumadto ha palasyo. Diri maaram an hadi nga an naatubang ha iya amo hi Juan. Kundi nalipay nga ginduaw hiya hin usa nga prinsipe nga may maupay an tindog. Ginhangyo han prinsipe nga makilala an prinsesa kay karuyag niya pakaslan ngan tagan hin damo nga bahandi.

Samtang nalilisan an ngatanan ha pagtima para han kasal, usa nga sundalo tikang ha iba nga ginhadian an umabot nga may-ada igsusumat ngadto han hadi.

“Mahal nga Hadi, maaram ako nga ikarasal an imo anak ha usa nga prinsipe. Pero kinahanglan nga mahibaro ka han kamatuuran,” siring han sundalo.

Didto nahisabtan han hadi kun hin o gud man hi Juan Pusong. Dara hini, may ada nahunahunaan nga plano para kan Juan.


Ha adlaw han kasal, duro an pamulat ni Juan han iya prinsesa nga naglalakat tipakadto ha altar. Natatahuban an kahimo niya hin busag nga tela.

Duro an pagtood ni Juan nga ha adlaw mismo hiton magigin asawa na niya an pinakamahusay nga babayi ha ginhadian.

Duro an hipausa ni Juan han pagtanggala niya han tela ha kahimo han prinsesa. Nakada ha iya atubangan an prinsipe nga iya anay gilingo.

Han tilayas na hi Juan dayon hiya gindakop han mga sundalo.

Hinarani ha iya an hadi.



“Juan Pusong, ano yana it imo inaabat? Ikaw naman yana an nauwat?” pakiana han hadi. Tumamod la hi Juan Pusong.

“Gawas dinhi ha akon ginhadian!” sugo han hadi.

“Mga magbarantay, kuhaa niyo ini nga lalaki ha akon atubangan!” guliat han hadi.

Waray nahimo hi Juan. Mabug-at man an dughan umupod hiya ha mga magbarantay.

San o hiya gumikan, lumingi hiya ngan nakayakan hin usa nga saad nga magbabag-o na.